

龍門志

天下

也龍

日夕

浮翠

於海

大巡

河北大學圖書館編

# 河北大學圖書館藏 稀見方志叢刊

河北大學  
圖書館藏

國家圖書館出版社

之勝槩也天下之人慕龍門之勝者

河北大學圖書館 編

河北大學圖書館藏稀見方志叢刊

7

國家圖書館出版社

## 第七冊目錄

【乾隆】盤山志 十六卷首五卷（卷六至卷十六）

.....

盤山志卷之六

寺宇二

萬松寺舊名衛公庵菴西上舞劍臺乃唐李藥師靖  
舞劍處也菴不知建於何時萬歷四年僧普照卓  
錫於此道人脩淨業神宗御書清心二字存菴中  
崇正中僧勝雲重脩

國朝康熙四十四年僧祥慶又新之

聖祖駕幸

御書樂天真三字懸殿中央

敕改萬松寺乾隆十年

賜金繕葺寺左有仙人橋右有橐陀石石上刻

御製詩前峙浮青歡喜二嶺

呂升凱重脩衛公庵碑記往官閒曹休沐暇嘗偕  
客縱游西山四顧巖壑聳秀天矯幽竒撫掌大笑  
曰近畿勝槩觀止矣客曰未也畿之東為漁陽郡  
郡之西北三十里為盤山勢迴旋而磅礴左碣石  
右洶水滄溟匯其南厓額環其北層巒疊嶂接日  
干霄飛瀑奔泉噴松關石中有古刹七十餘此乃



近畿一巨觀也時恍然神游其際頃之不自意拜  
度支郎命來董薊諸竊幸天假勝緣比值羽書旁  
午日敞於會計未踐夙盟適家弟升時至覽興鬱  
勃挾侶作小試遊循趾及腰捫蘿躡磴層累而登  
是為盤山危峰陡絕鳥道猿攀最高者曰上盤跡  
未及到已駭目動心嗒然而返歸休於衛公庵菴  
之住持勝公供茗出與語雅有宗風相將登眺祇  
見拓基宏敞構宇崇隆不知廢幾許工力步至庭  
際有豐碑夾峙已鐫其一諦視之則少林寺嵩麓

上人以重建落成爲大師普照祖若孫志其勤也  
其一尚濯濯叩之勝公對曰是役也肇自神宗初  
年嘉賴十方微普照祖大願力不及此遞及孫雲  
輩廣募益摯飽茹苦辛歷數十禩迺觀厥成懼代  
遠績湮勒之貞珉以昭示後人然一切功德主無  
量福田豈可令其泯泯無聞用是虛石以待家弟  
曰有是舉盍圓是事勝公進曰曩嘗勺之名公大  
人矣未荷許可今之使君介弟得無意乎倘徼惠  
于部使君不靳元屑於以並垂不朽幸甚家弟遂

巡不能卻輒唯唯歸以語余余瞿然自失曰盤山  
為海內游覽地騷人宗匠往來如織吾雖少讀父  
書長而不文豈以名碩所避席者而為我漫嘗之  
顧家弟業謬諾之矣且奈何况茲勝概余屐齒未  
到又菴以衛公得名亦未遑詳考余何言姑就勝  
公之語次其顛末為諸檀越志功德云爾繫之以  
銘銘曰維山崢嶸懸削林立維水潺湲紆迴環碧  
翠微鬱蓊爰敞梵宮厥標伊何唐勲衛公疇則開  
宗實繫普照疇則繼志雲孫克紹輪奐有煒鳥草



翬飛廣募累勦式廓丕基林總檀邨聚沙成米令  
德昭垂千秋曷已崇正十三年庚辰九月

程文彞重修李靖菴記盤山畿東勝地也去神京  
百八十里與翠屏山相接龍山環匝鳳水縈紆有  
龍遊鳳覽之勢緣崖攀磴而上雲氣嵐光青紫萬  
狀左有仙人橋青溝飛流激湍磅礴於蒼松古栢  
間恍惚不可端倪至礧道盤鬱一似太行之山之  
谷故又號盤谷右仄徑而下乃舞劍臺相沿為唐  
李靖學劍處再迤邐而後有六王寨說者謂七國

時燕太子丹會六王故名風日晴好振衣登其巔  
則舍利塢在焉塔中舍利為漢金仙所遺事浸久  
不可考旁有挂月峰相對為自來峰法華洞五峰  
八石三洞芝草錯雜其間此洞天福地也遊仙往  
往過之明普照大師名明空豐潤人宋姓棄家安  
禪神宗知之賜清心二字劄一道歸盤山未幾徒  
道安嗣其法

今上御極之十有四年歲次己卯十月駐

蹕訪盤山之勝住僧祥慶嗣孫來平隨

駕登山蒙

上顧問賜金戊午秋己未春更蒙

賜金及

宸翰樂天真三字丙寅冬

駕再臨辛未秋僧來平接理法席甲申春

駕復巡幸

恩賜敕改萬松寺及

御書金經等誠亘古之奇逢不世之異數祇樹園中獲此

墨寶與盤山並峙乾坤彪炳日星昭灼岳瀆久而

彌昌遠而彌光又豈千百代易得之遇耶揣知拈  
花時無詞可贊請以秀色滿天東一語作頌然猶  
恐彰美傳盛之未詳也爰撫數語勒之石以垂不  
朽云康熙四十四年歲次乙酉四月

阮旻錫宿衛公菴詩乍到翻疑夢如登故國山路  
盤千嶂入人在萬松間夜雨泉邊至秋聲塞外還  
英雄空說劍何似老僧閒

鄭纘祖宿衛公菴詩庵從昔賢名客自今秋至流  
覽值新晴山容分外翠嵯懸松子落壁斷鼃鼃戲

簷際影蕭疎輕颺颺薜荔躋攀信忘疲深坐猶如  
跂高閣俯層巒一一當窓視名象紛難齊衰暉晚  
滋媚林昏忽已暝月出景逾異棲鳥時一鳴山空  
人未睡有懷成獨往幽通小徑邃聞寂澗香生空  
虛囂響墜寒泉兼落葉靜聽聲不二夜迴佛燈涼  
孤光耿宵寐

高士奇衛公菴詩夾天開小徑窄峇隱諸峰黛色  
千崕石濤聲萬壑松林深微見寺谷靜遠聞鐘虛  
閣何年藉聊清塵外蹤



袁松衛公庵詩此地真堪隱山窓晚更幽月移松  
磴出風定石泉流覓句慚高適摩碑憶李侯還期  
登絕頂千里望中收

梁洪入盤山宿衛公菴詩盤盤石路到高峰繞寺  
蒼蒼萬樹松杖底泉虛青草遍鳥邊厓斷白雲封  
塵襟遠隔如千里山色才看第一重獨念今宵禪  
榻穩不眠先聽上方鐘

張朝琮衛公菴詩昔賢久云沒勲業在青史如何  
巖穴間英名尚留此嵯峨梵宇深怪樹蚪龍徙高

閣俯嶙峋幽潔無塵滓猿攀鳥道紆崇臺亘聳峙  
突兀矗層霄雲霞接步履精爽應不昧中夜練光  
起竒才曠遠猷根性非凡鄙誰云當暮年烈士心  
未已登臨懷古今俯仰思所以其然豈其然千載  
存疑似

法藏寺舊名茶子菴成化中脩

國朝康熙中僧養心又脩乾隆十九年奉

敕脩殿左有古松為盤山第一住僧實乎擬建東廂欲  
去此樹夜夢一碩士揖而告曰吾住此山久矣師

奈何促吾行僧覺其異遂不敢伐前有法船石門  
東有楞嚴臺石

王嘉謨法藏寺詩折阪殿懸厓悠然縱鞍韉綿綿  
谷口雲飄墮白如練峰巒忽相冒竒石還驚眩大  
者數十尋小或等冠弁峰巔有紺宇歷歷皆可見  
永懷僧栖樂倍覺塵情倦稀逢采芝侶獨立幾回  
盼

李鐫法藏寺詩至味伏餘甘脩塗引紆步沙石犬  
牙嚙人遵虎行路壑陰塞叢莽亶荒立枯樹野風

來蕭蕭若與山鬼還道心不自鎮白日生恐怖  
嶮嶮終古中乃具百度古瓦栖圓榱丹華脫桓柱  
龕燈久無蕊遂為靈狐据生滅信更事此理長不

住大地接慈航

寺前有  
法船石

風波卒誰渡

智朴法藏寺詩排列峰巒似弟昆週迴四顧總無  
門奇松蚪結龍蛇聞怪石爛斑虎豹蹲僧老巖頭  
驚俗客花開洞口護仙源卜居喜近三椽地日日

來游不憚煩

青峰寺舊名青峰菴在青楊峪明正德丙子僧德果